

گوجری زبان

(ایک تعارف)

رانا ابرار

اللہ تعالیٰ نے اس کُره ارض ور طرحیا طرحیا کی جاندار تے بے جان چیزاں نا پیدا کیو ہے۔ اللہ تعالیٰ نے جاندار تخلیقاں نا سوہنا سوہنا رنگاں چال چلن تے خصلتاں نال نوازیو ہے جن مانہ انسان نا اشرف المخلوقات بنا کے دماغ ہور عقل کے نال نال بولن کی طاقت وی دتی۔ نور تے دوجا سارا جانور وی اپنی مخصوص بولی بولیں۔ جس راں ڈنگر رامبیں ؛ مہیس رینگیں ؛ چڑی چخاریں ؛ کاگ ٹانکیں ؛ ککڑ بانگیں ؛ سپ پھنکاریں ڈڈ ٹنیکیں مگر انسان اللہ کی واہ واحد مخلوق ہے جس نا اس نے بولن کی اٹکل دتی ہور بولنو ہی جذبات کا اظہار کو سب توں موثر ذریعو ہے دنیا بھر مانہ انسان زمانہ کا ہر دور ہور ہر حصہ مانہ بکھ بکھ بولی بولتا آیا ہیں ۔ جہڑی ہر زمانہ مانہ بگڑ کے نوئیں شکل اختیار کرتی رہی ہیں ہور نواں نواں ناناں سنگ جانی جاتی رہی ہیں۔ بڑی بولیاں جن مانہ ادب لکھیو جائے نا زبان تے نکڑی بولیاں نا بولی کہیو جائے۔ ریاست جموں کشمیر مانہ خاصی ساری زبان تے بولی بولیں جن مانہ اردو کشمیری ڈوگری گوجری پہاڑی شینا وغیرہ شامل ہیں۔ ادب مانہ امیری کا لحاظ نال گوجری زبان کشمیری تے ڈوگری توں بعد ریاست کی تیجی بڑی زبان ہے جد کہ آبادی کا لحاظ نال دوجی بڑی زبان ہے۔ گوجری زبان ایک بین الاقوامی زبان ہے جہڑی بھارت توں پاکستان تے افغانستان ہور عراق تک پھیلی وی ہے۔ بھارت مانہ ریاست جموں کشمیر توں علاوہ اتراکھنڈ ہریانہ یو پی ہماچل پنجاب مانہ وی گوجری بولی جائے جد کہ یاہ زبان ریاست جموں کشمیر کا ہر ہر کونا مانہ بولی جائے۔ گوجری زبان ایک مچ قدیم زبان ہے جس کی تاریخ صدیاں ور پھیلی وی ہے۔ بڑا بڑا زبان دانان کے مطابق اردو زبان وی گوجری کی بگڑی وی شکل ہے۔ اس وقت وی اردو مانہ بولیاں جان آلا ہزاراں الفاظ گوجری کا ہی ہیں۔ گوجری زبان کی اپنی سنہری تاریخ ؛ اپنی قواعد ؛ اپنی لغت اپنو لوک ادب اپنو ادبی اثاثو تھیٹر اخبارات کتب تے رسائل ہیں۔ گوجری زبان مانہ کئی ریڈیو اسٹیشنن تے ٹیلی ویژنن ور نشریات ہوئیں ہور سوشل میڈیا ور وی یاہ زبان چھائی وی ہے۔ ات توہڑی جے اس زبان مانہ فلم وی بنی وی ہیں۔ جن نا بین الاقوامی سطح کا فلم فیسٹولان مانہ نمائش واسطے دسیو گیو۔ گوجری زبان ہن یونیورسٹیاں کا نصاب مانہ وی شامل کر دتی گئی ہے ہور بابا غلام شاہ بادشاہ یونیورسٹی ملکہ کی پہلی اسی یونیورسٹی ہے جس مانہ گوجری مانہ پوسٹ گریجویشن کی ڈگری متعارف کروائی گئی ہے۔ اس توں علاوہ گوجری جموں یونیورسٹی مانہ وی ماسٹرس ڈگری کے نال اضافی ششماہی مضمون کا دور ور پڑھائی جائے تھی۔ گوجری شاعری کی اصناف سخن مانہ سی حرفی ؛ باران ماہ ؛ دوبا ؛ گیت ؛ غزل ؛ بزل نظم ؛ نظم معری قطعات سائینٹ شامل ہیں۔ اس زبان مانہ بے شمار کہانیاں ؛ افسانہ ؛ ڈرامہ ؛ انشائیہ ؛ تے ناول وی لکھیا گیا ہیں۔ رانا فضل حسین نا اہل ادب نے بابائے گوجری منیو ہے۔ خدا بخش زار گوجری سی حرفیاں کا بادشاہ منیا

جائیں ؛ اسرائیل اثر گوجری گیتاں کا شہنشاہ ؛ مخلص وجدانی نا گوجری غزل کو بادشاہ منیو جائے۔
ڈاکٹر مرزا خان وقار گوجری کا پریم چند منیا جائیں ؛ ڈاکٹر رفیق انجم گوجری کا اعلیٰ پایہ تاریخ داں
تے لغت ساز ہیں ؛ سروری کسانہ گوجری صحافت کا بادشاہ منیا جائیں۔ روداد قوم اخبار ؛ شیرازہ
گوجری ؛ مہارو ادب ؛ سبیل ؛ وغیرہ گوجری کا مسلسل اشاعتی جریدہ تے رسائل ہیں۔ جدید گوجری
کا قدیم شاعران مانہ میاں عبداللہ لاروی ؛ نون پونچھی ؛ مولوی علمدین بن باسی ؛ ذبیح راجوروی ؛
مولانا مہر الدین قمر ؛ سائیں قادر بخش وغیرہ کا نام شامل ہیں جن نے زیادہ تر سی حرفی بیت تے
باراں ماہ لکھیا ہیں۔ دوجا دور کا شاعران مانہ اسرائیل اثر ؛ اقبال عظیم ؛ نسیم پونچھی ؛ سروری
کسانہ ؛ مولوی غلام رسول ؛ رانا فضل حسین ؛ ڈاکٹر صابر آفاقی ؛ نذیر احمد نذیر ؛ ابرار احمد ظفر ؛
سرور حسین طارق ؛ عبدالغنی عارف وغیرہ نے گوجری نا بلندیوں ور پہچائیوں ان کے نال نال مخلص
وجدانی ؛ ڈاکٹر رفیق انجم ؛ منشی خاکی ؛ سکندر حیات وفا ؛ اشتیاق احمد شوق ؛ خاقان سجاد ؛ نور
محمد مجروح ؛ جان محمد حکیم ؛ ریاض صابر ؛ ایاز سیف ؛ رفیق سوز ؛ رشید شبنم اوان ؛ بابو نور
محمد لعل الدین شاکر ؛ تاج الدین تاج جیسا شاعران نے گوجری کا شاعری معیار نا ہور بلند کیو ہے۔
گوجری کا فکشن نگاران ؛ ڈرامہ نگاران تے تحقیق کاران مانہ غلام رسول آزاد ؛ غلام رسول اصغر
؛ قیصر الدین قیصر ؛ شریف شاہین ؛ ڈاکٹر نصرالدین بارو ؛ عبدالسلام کوثری ؛ ڈاکٹر جاوید راہی ؛
حسن پرواز ؛ ؛ پروفیسر ایم کے وقار ؛ سکندر وفا ؛ مرحوم امین قمر ؛ مختار الدین تبسم ؛ غلام
سرور چوہان ؛ وزیر بجران ؛ محمود رانا ؛ شریف چوہان وغیرہ کا ناں شامل ہیں۔ اجکل کا دور مانہ
گوجری مانہ نواں فکشن رائٹراں مانہ رانا ابرار چوہدری ؛ اشتیاق احمد مصباح ؛ منظور الحق
کلانیوی ؛ کلثوم چوہدری ؛ شمی ناز ؛ شمائلہ عبیر ؛ جنید جازب ؛ وغیرہ کا ناں گنیا جا سکیں اج کا
دور کا شاعران کی فہرست کافی لمبی ہے جن مانہ میاں عباس باسی ؛ اقبال حیات ؛ جاوید سحر ؛
محمد ٹھاکر ؛ حنیف محمد چوہدری ؛ زاہدہ خانم ؛ رانا ابرار ؛ بلال زمزم ؛ ممتاز چوہدری ؛ آصف
راحت بھدرواہی ؛ جاوید مسرور ؛ جاوید منصور ؛ صدام صارف وغیرہ کا ناں خاص طور ور قابل
ذکر ہیں گوجری زبان بیشک ایک بڑی زبان ہے مگر اس سنگ سرکاری سطح ور ہمیشاں ماتریرو
سلوک رہیو۔ ہم ساراں نا چائیے کہ ہم اپنی زبان نا ہر جگہ بولاں ہور اپنی زبان نا عزت تے مان دیاں۔
مہاری عزت مہاری زبان نال ہے۔ ہم نا ہر جگہ اپر اپنی زبان کو استعمال کرنو چائیے ہور اپنی زبان
بولتاں واں کوئے جھک محسوس نہیں ہونو چائیے۔ کیونجے گوجری زبان آلاں ایک بڑا ثقافتی تمدنی
تے ادبی تے لوک ادبی ورثہ کا وارث ہیں جن نا اپنی اس شاندار نشان ور ناز ہونو چائیے۔